


Nan ta cla pa start un programa pa promove boxeo bou di nos hobennan

Minister a topa cu dirigentenan di Golden Boy na Los Angeles

Oscar de la Hoya interesa den habri gym y organisa peleanan internacional na Aruba!



DESPUES di algun luna di contacto estrecho entre Minister di Deporte Dr. Richard Visser y Golden Boy Promotions, awor

e relacion ta asina leu cu a topa cu otro y a establece e prome piedra pa un proyecto cu ta priminti di bira algo grandi pa

nos isla.

Via su contactonan Minister Dr. Richard Visser a reuni cu CEO di Golden Boy Promotions, Richard Schaefer y cu e COO di e compania, David Itskowitch. Durante e encuentro cu a tuma lugar den Golden Boy Building na Los Angeles, a propone na e compania pa bin organisa pelea amateur y profesional na Aruba. Mesora e compania a muestra interes pa e idea aki y a ofrece pa organisa por lo menos un pelea grandi pa aña cu lo conta cu cobertura bibo di e canal di television Mericano HBO.

E minister di deporte di Aruba a repasa su plan di movecion y di

organisa eventonan deportivo pa e hobennan di Aruba y Golden Boy Promotions mesora a saca un man pa yuda den e plan integral aki. A propone pa habri un gym di boxing na Aruba, cu lo carga e nomber di Oscar de la Hoya. Esaki lo no keda solamente na un nomber pasobra e ex-campeon di boxeo y actual promotor di peleanan di boxeo ta cla pa ehecuta un programa di educacion deportivo bao di nos hobennan, algo similar manera cu su compania ta haciendo na Los Angeles caba. E ta kere cu hobennan semper ta busca un "role model" y e ta cla pa asumi e reto ey.

Dentro di algun luna mas e lo

bishita Aruba y ta spera cu den un tempo masha corto lo por cuminsa organisa peleanan boxistico riba nos isla. Ambos gerente di Golden Boy Promotions ta na caminda pa Aruba pa bin sera conoci cu nos facilidad y posibilidad riba e tereno di boxeo.

Minister dr. Richard Visser a sigura cu "ta esaki ta e caminda cu nos kier hiba nos deporte, na e siguiente nivel. Nos hobennan ta buscando coi haci despues di scol, nan mes kier move, pero no tin suficiente posibilidad. Cu e proyecto aki, pronto Aruba lo conta cu su propio idolonan den boxeo", asina Minister dr. Richard Visser a sigura.